

# IN IPAN YIYI ITLAHCUILOLAMATZIN TLEN OQUIMOIHCUILUI IN TETIOTLATITLANIL JUAN

---

<sup>1</sup>Nehhuatl Juan, in tlayecanqui ipan inon tetiotlayehualoltzin Dios. Niquihcuiluiya inin amatl in totlasohicniu Gayo, in aquin nictlasohtla melahuac.

<sup>2</sup>Notlasohicniu, nimoyolmactiya mayau nochin cuali ica tehua huan xiye chicahuac, quen timocahua cuali teca in Dios. <sup>3</sup>Sequin den tocnihuan ohualahsihque huan onechnonotzque ica motlaneltoquilis, ijcon quen tictlacamautica in tlen melahuac. Huan ijcon onechpacmacahque.

<sup>4</sup>Ahmo oncan tlen ocachi ic manipaquis quen nicmautoc quen nopiluan quitlacamauticaten in tlen melahuac.

<sup>5</sup>Notlasohicniu, tiquinchiuilihtica cuali queman tiquimpalehuiya in tocnihuan ica tlen quimpolohua masque ahmo tiquinixmati. <sup>6</sup>Yomocuepque ipan in tetiotlayehualoltzin sequin inohque tocnihuan, huan otechnonotzque quen tequin otiquintlasohtlac. Nimitztlatlautiya xiquimpalehui ica in tlen

quinequisque ipan in ohtli. Huan ijcon matiquimpalehuican quen tepactiya in Dios. <sup>7</sup>Tleca omocalactihque yehhuan ipan inon tequitl teca Jesucristo huan ahmo quiselihtohque niyan tlen ic motecpanosque ica yehhuan aquin ahmo teixmatihque in Dios. <sup>8</sup>Huan ic inon tehhuanten matiquintequipanocan huan ijcon timosetiliyahque ipan intequiu teca in Dios.

## In itlaixnamiquilis in Diótreres

<sup>9</sup>Nehhuatl onamechihcuilui namehhuan ipan itiotlayehualoltzin Dios, huan in Diótreres ahmo nechcaquisnequi, tleca quipactiya mohueyilis namoixpa. <sup>10</sup>Tla cana niyas, namechnextilitiu ican tlen noca quihtohinemi. Huan ahmo san ijcon quichiutoc, tlahmo noyojqui ahmo quinsehuisnequi in tocnihuan aquin oahsiohque. Huan quintlacahualtiya in aquin quinsehuisnequihque, huan quintotoca de ipan itiotlayehualoltzin Dios.

<sup>11</sup>Notlasohicniu, ahmo xicchihua cuenta ica inon ahmo cuali

tlamachilistli, huan xicchihua  
 nochin in tlen cuali. In aquin  
 quichiutinemi tlen cuali, yeh  
 in teconeu in Dios. In aquin  
 quichiutinemi tlen ahmo cuali  
 ahmo teixmautoc in Dios.

**In ichipaucanemilis in Demetrio**

<sup>12</sup>Nochten tocnihuan  
 quiluiyahque mach cuali tlatatl  
 in Demetrio, huan nochin  
 tlen quichihua quixnamictiya  
 itlahtoltzin Dios. Neh noyojqui  
 namechiluiya yehhua se cuali  
 tlatatl huan namehhuan

nanquimatihque nochipa niquihtos  
 tlen melahuac.

**In tlahtolten tlen ic tlamis**

<sup>13</sup>Nehhua nicpiya tequin tlen  
 nimitziluis, huan ahmo nicnequi  
 ocachi nimitztlahcuiluis. <sup>14</sup>Tleca  
 nicnequi nimitzitatiu ihsiu.  
 Ijcon timonohnotzasque ihcuac  
 timoyequixitztiyesque.

<sup>15</sup>Ahmo tlen mamitzyolmohsihui.  
 In motenonotzcahuan de  
 nican mitztlahpalohuahque.  
 Nimitztlatlautiya xiquintlahpalo  
 cada seya den totenonotzcahuan.